

Naqqiut

Siunnersuut ulloq 14. august 2020-meersoq taarserpaa

(Oqaaseqatigiiliornernik aaqqisoqarlunilu ersarinnerulersitsisoqarpooq kiisalu qulequttap
nassuaataa allanngortinneqarluni)

Siunnersummut nassuaatit
Nassuaatit nalinginnaasut

1. Aallaqqaasiut

Siunnersummi siunertaavoq feriarneq pillugu inatsisip iluarsineqarnissaa, taamaalilluni inatsisip allanngortinneqarnerata kingorna akiliinerit akileraarusigaasunit akilerneqarpata, soraarnerussutisianut aaqqissuussinernut akiliutinit feriarnersiutinik akiliisoqartarunnaassalluni.

Siunnersuut, feriarneq pillugu inatsimmi § 16, imm. 1-imi aalajangersakkap atuuttup, aammalu aningaasarsianit akileraarutit pillugit inatsisimmi § 39, imm. 1 nr. 1-ip allanngortinneqarnerata, aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat nr. 7, 6. juni 2016-imeersumi, ulloq 1. januar 2017 atuutilersumi pisup akornanni ataqtigisiitserni pilersumut, tunngassuteqarpooq.

Feriarneq pillugu § 16, imm. 1-imi atuuttumi allassimavoq, feriarnersiutinik aamma immikkut ittumik feriarnersiutinik naatsorsuinermi akissarsianut tapiliussat taamaattut imaluunniit akissarsiat ilaat isertitatut akileraaruteqaataasussaanngitsut taamaattut, ilanngunneqassanngitsut. Taamaattoq sulisitsisoq sulisartup soraarnerussutisianut aaqqissuussinermut il.il. akiliutaanit feriarnersiuteqartitsisarpoq aammalu immikkut ittumik feriarnersiuteqartitsisarlni. Maannakkut atuuttup oqaasertalerneqarnerani aalajangersakkap, aningaasarsianit akileraarutinut inatsimmut ataqtigisiillugu, malitsigisaanik maannakkut aamma nunani allani soraarnerussutisianut akiliutinit, akiliutit taakku akileraaruserneqartussaanerat pissutigalugu, feriarnersiutinut aamma immikkut ittumik feriarnersiutinut akiliisoqartartussaavoq. Kisiannili nunatsinni soraarnerussutisianut aaqqissuussinernut akiliutinit feriarnersiutinut imaluunniit immikkut ittumik feriarnersiutinut akiliisoqartussaanani. Aningaasarsianit akileraarutit pillugit inatsisip allanngortinneqarnerata, 2016-imi pisup, siunertaanngitsumik malitsigisaa tassani pineqarpooq aammalu pissusiviusuni tunngavilersugaanani.

Feriarneq pillugu inatsisip allanngortinneqarnissaanut siunnersuutigineqartumi siunertaavoq, nunatsinni soraarnerussutisianut aaqqissuussinermut imaluunniit nunani allani soraarnerussutisianut aaqqissuussinermut akiliisoqarnersoq apeqquaatinagu, soraarnerussutisianut aaqqissuussinernut tunngatillugu feriarnersiutinut aamma immikkut ittumik feriarnersiutinut naatsorsuinermut tunngaviusut assigiilersinnissaat.

2. Siunnersuummi immikkoortut pingarnerit

Siunnersuutigineqarpoq akissarsianut tapiliussat taamaattut imaluunniit akissarsiat ilaat taamaattut isertitatut akileraaruteqaataasussaanngitsut imaluunniit sulisitsisup soraarnerussutisianut aaqqissuussinermut akileraaruteqaataasussamut akiliutai, feriarnersiutinik aamma immikkut ittumik feriarnersiutinik naatsorsuinermi ilanngunneqassanngitsut. Taamaattoq sulisitsisoq sulisartup soraarnerussutisianut aaqqissuussinernut il.il. akiliutaanit feriarnersiuteqartitsisarpoq aamma immikkut ittumik feriarnersiuteqartitsisarluni.

Siunnersuutip kingunerisaanik inatsisitigut inissisimaneq ulloq 1. januar 2017 atuuttoq uterfigineqassaaq, taamaalillunilu nunatsinni soraarnerussutisianut aaqqissuussinermut aamma nunani allani soraarnerussutisianut aaqqissuussinernut akiliutinut feriarnersiutit aamma immikkut ittumik feriarnersiutit naatsorsorneqarnerisa siunertaanngitsumik assigiinngitsuunerat atorunnaarsinneqarluni.

Siunnersuut inatsimmut atuuttumut sanilliullugu	
<i>Oqaasertai atuuttut</i>	<i>Siunnersuut</i>
§ 16, imm. 1. Feriarnersiutit aamma immikkut ittumik feriarnersiutit naatsorsorneqarneranni akissarsianut tapiliussat imaluunniit akissarsiat ilaat isertitatut akileraaruteqaataasussaanngitsut ilanngunneqassanngillat. Sulisitsisorli akissaateqarluni sulisuusup soraarnerussutisiaqalernissamut aaqqissuussinernut il.il. akiliutaanit feriarnersiuteqartitsissaaq immikkullu ittumik feriarnersiuteqartitsissalluni.	<p>§ 1 Feriarneq pillugu Inatsisartut inatsisaat nr. 10. 12. november 2001-imeersumi makkuninnga allanngortitsisoqarpoq:</p> <p>1. § 16, imm. 1, imatut oqaasertalerneqarpoq: "Feriarnersiutit aamma immikkut ittumik feriarnersiutit naatsorsorneqarneranni akissarsianut tapiliussat imaluunniit akissarsiat ilaat isertitatut akileraaruteqaataasussaanngitsut imaluunniit sulisitsisup soraarnerussutisianut aaqqissuussinermut, soraarnerussutisianut aningaasaateqarfimmi imaluunniit aningaaserivimmeli, Kalaallit Nunaanni angerlarsimaffeqartuunngitsumi imaluunniit aalajangersimasumik ingerlatsiveqanngitsumi ilanngutsinnejartumut, akiliutai, ilanngunneqassanngillat. Sulisitsisorli akissaateqarluni sulisuusup soraarnerussutisiaqalernissamut aaqqissuussinernut il.il. akiliutaanit feriarnersiuteqartitsissaaq immikkullu ittumik feriarnersiuteqartitsissalluni."</p>

	§ 2 Inatsisartut inatsisaat ulloq 1. januar 2021 atuutilerpoq.
--	---

3. Pisortanut aningasaqarnikkut allaffissornikkullu sunniutaasussat

Aningasaarsianit akileraarutit pillugit inatsisip 2016-imi allanngortinneqarnerani nunani allani soraarnerussutisianut aaqqissuussinernut akiliutit akileraaruteqaataasussangortinneqarnerisa kingorna, pisortat feriarnersiutinut aamma immikkut ittumik feriarnersiutinut aningasaartuutaat nalorninartortaqartumik ukiumut 1,3 mio. koruunit missaannik qaffapput.

Siunnersuutip kingunerisaanik pisortat taamatut missingorsorlugit annertussuseqartunik sipaaruteqassapput.

4. Inuussutissarsiortunut aningasaqarnikkut allaffissornikkullu sunniutaasussat

Sulisitsut soraarnerussutisianut aaqqissuussinernut akileraaruteqaataasusanut akiliutiminnik feriarnersiutinik imaluunniit immikkut ittumik feriarnersiutinik akiliinissamik pisussaafferutiissapput. Naatsorsuutigineqarpoq siunnersuut inuussutissarsiortunut annikinnerusumik sipaaruteqarnermik kinguneqassasoq.

5. Avatangiisinut, pinngortitamut inuillu peqqissusaannut sunniutaasussat

Siunnersuut avatangiisinut, pinngortitamut inuillu peqqissusaannut sunniuteqassanngitsoq naatsorsuutigineqarpoq.

6. Innuttaasunut sunniutaasussat

Sulisartut feriarneq pillugu inatsimmut tunngatillugu assigiimmik pineqalissapput, tassami nunani allani soraarnerussutisianut aaqqissuussaqarnermi feriarnersiutinik imaluunniit immikkut ittumik feriarnersiutinik tigusaqartoqartarunnaassammat. Sulisartut nunatsinni soraarnerussutisianut aaqqissuussaqartut, sulisartunut nunani allani soraarnerussutisianut aaqqissuussaqartunut/soraarnerussutisianut aaqqissuussinermi, aningasaarsianit akileraarutit pillugit inatsimmi § 39, imm. 1, nr. 1-imi pineqartunut ilaasunut procentingorlugu feriarnersiuteqartitsinerup aamma immikkut ittumik feriarnersiuteqartitsinerup assinganik tigusaqartalissapput.

Siunnersuut sulisartunut namminersortuni aamma pisortani atorfekartunut amerlasuunut kalluaasussaavoq. Siunnersuut allanngortitsinermi kalluarneqartunut annikinnerusunik aningasaqarnikkut sunniuteqassaaq.

Nalorninartoqartitsilluni akissarsiaqarlutik sulisartut siunissami feeriarnersiutinik immikkullu ittumik feeriarnersiutinik ukiuni 2017-2020-mi ukiumut katillugit 1,3 mio. kr.-nik anaasaarnissaat ilimagineqarpoq.

7. Sunniutaasussat annertuut allat

Siunnersuut allanik annertuunik sunniuteqassangatinneqanngilaq.

8. Oqartussanut kattuffinnnullu il.il. tusarniaaneq

Siunnersuut piffissami 19. juni 2020 - 19. juni 2020 makkunani tusarniaassutigineqarpoq:
 Naalakkersuisut Siulittaasuata Naalakkersuisoqarfia, Inuussutissarsiornermut,
 Nukissiuuteqarnermut, Ilisimatusarnermut Suliffeqarnermullu Naalakkersuisoqarfik, Avannaata
 Kommunia, Kommuneqarfik Sermersooq, Kommune Qeqortalik, Qeqqata Kommunia, Kommune
 Kujalleq, GrønlandsBANKEN, BankNordik, SIK, IMAK, ASG, PPK, AK, GE aamma NUSAKA.

Siunnersuut aammattaaq uani www.naalakkersuisut.gl tusarniaanermut nittartakkami tamanut
 saqqumitinneqarpoq.

Tusarniaanermut piffissaliussap naanerani tusarniaanermut akissuteqaatit makkunanna
 tiguneqarput:

BankNordik, SISA, Sulisitsisut, ilinniagartuut kattuffii ASG-mut ilaasortaasut, Kommune Kujalleq
 aamma Qeqqata Kommunia

Tusarniaanermut akissuteqaatit tiguneqartut inatsisisstatut siunnersuummut imaluunniit
 nassuaatinut allanngortitsinissamik pissutissaqalersitsinngillat.

Tulliuttuni tusarniaanermut akissuteqaatit, avataanut tusarniaanerup nalaani tiguneqartut,
 sammineqarput. Oqaatigineqassaaq tusarniaanermut akissuteqaatit uingasumik allassimammata,
 aammalu tusarniaanermut akissuteqaatit pingaaruteqassusaannik nalilersuineq tunngavigalugu
 pingaarnersiorlugit issuarneqarlutik.

BankNordik, Sulisitsisut aamma ilinniagartuut kattuffii ASG-mut ilaasortaasut, inatsisisstatut
 siunnersuummut oqaaseqaatissaqarsimannngillat.

SISA-mit tusarniaanermut akissuteqaat:

SISA-p siunnersuut tikilluaqqua. Soraarnerussutisianut akiliutit, soraarnerussutisianut akiliut
 ilanngaatigisinnaatitaallugu imaluunniit ilanngaatigisinnaatitaanagu akilerneqarsimansoq
 imaluunniit ilanngutinngikkallarsinnaanerat apeqqutaatinnagu, ilaatigut feriarnersiutinik aamma
 immikkut ittumik feriarnersiutinik naatsorsuinermut tunngatillugu assigiimmik suliarineqarnissaat
 pingaaruteqarpoq.

Kommune Kujallermit tusarniaanermut akissuteqaat:

Kommune Kujallermi najoqqutassat nassiuinneqartut misissorpagut aammalu ileqqorissaarnissaq
 eqqarsaatigalugu nalunaarutigissallugu, 2016-imi aningaasarsianit akileraarutinut inatsisip
 allangortinneqarnerata siunertaanngitsumik malitsigisai pineqartut aammalu pissusiviusunik
 aallaaveqanngitsoq tunngavilersuutigalugu, inatsisisstatut siunnersuut tusaatissatut tigugippit.

Qeqqata Kommunianit tusarniaanermut akissuteqaat:

Matumuuna Qeqqata Kommunianiit allannguutissanut inatsisissatut siunnersuummut ersarissumik tapersiivugut.

Tassami maannamut pisartutut Kalaallit Nunaanni sulisunut nunatsinni najugaqartunut soraarnerussutisianut aaqqissuussinermi feriarnersiutinik aamma immikkut ittumik feriarnersiutinik naatsorsuisoqartanngimmat, Kalaallit Nunaanni angerlarsimaffeqanngitsunut imaluunniit aalajangersimasumik ingerlatsiveqanngitsunut soraarnerussutisianut aaqqissuussinermi feriarnersiutinik aamma immikkut ittumik feriarnersiutinik aamma naatsorsuisoqartartussaanngitsoq taperserneqarpoq.

Qeqqata Kommuniata feriarneq pillugu inatsisip allannguuteqarluni ilusilerneqartup, Kalaallit Nunaanni imaluunniit nunani allani soraarnerussutisianut aaqqissuussinermut akiliisoqarnersoq apeqqutaatinagu naatsorsuinermut tunngavissanik assigiisitsilernissaa taperserpaa.

Inatsisip allanngortinneqarnerani nunatsinni soraarnerussutisianut aaqqissuussinerit aammalu nunani allani soraarnerussutisianut aaqqissuussinerit kisimik isummerfigineqartut, Qeqqata Kommunianit tusarniaanermut akissuteqaammut matuma siulianiittumut Aningaasaqarnermut Naalakkersuisoqarfiup oqaatigaa. Inatsisip allanngortinneqarnera sulisartup najugaanut tunngassuteqanngilaq. 2016-imi aningaasarsianit akileraarutinut inatsisip allanngortinneqarnissaa sioqqullugu sulisitsisup soraarnerussutisianut aaqqissuussinernut akiliutaannit feriarnersiutinik aamma immikkut ittumik feriarnersiutinik akiliisoqartanngilaq. 2016-imi aningaasarsianit akileraarutinut inatsisip allanngortinneqarnerata kingunerisaanik sulisitsisup nunani allani soraarnerussutisianut aaqqissuussinernut akiliutaannit feriarnersiutinik aamma immikkut ittumik feriarnersiutinik maannakkorpiaq akiliisoqartartussaavoq, kisianni nunatsinni soraarnerussutisianut aaqqissuussinernut akiliisoqartartussaanani. Inatsisip allanngortinneqarnerani matumani inatsisitigut inissisimaneq 2016-imi aningaasarsianit akileraarutinut inatsisip allanngortinneqarnera sioqqullugu atuuttoq uterfigineqartussaavoq, taamaalilluni nunatsinni soraarnerussutisianut aaqqissuussinermut imaluunniit nunani allani soraarnerussutisianut aaqqissuussinernut akiliisoqarnersoq apeqqutaatinagu, soraarnerussutisianut aaqqissuussinernut feriarnersiutinut aamma immikkut ittumik feriarnersiutinut naatsorsuinermut tunngavissat assigiilerlutik.

Siunnersummi aalajangersakkanut ataasiakkaanut nassuiaatit*§ 1-imut*

Nr. 1-imut

§ 1, imm. 1-imut allannguutissatut siunnersuutip malitsigisaanik feriarneq pillugu inatsimmi § 16-imi siunertaaqqaartoq 2001-imeersoq atuutsiinnarneqarpoq. Tamanna pissaaq, akissarsianut tapiliussat imaluunniit akissarsiat ilaat isertitatut akileraaruteqaataasussaanngitsut, kiisalu sulisitsisup soraarnerussutisianut aaqqissuussinermut, soraarnerussutisianut aningaasaateqarfimmi imaluunniit aningaaserivimmi, Kalaallit Nunaanni angerlarsimaffeqartuunngitsumi imaluunniit aalajangersimasumik ingerlatsiveqanngitsumi ilanngutsinneqartumut, akiliutaasa ilaasussaatinnginnerisigut. Taamaattoq sulisartup soraarnerussutisianut akiliutaannit feriarnersiutinik naatsorsuisoqassaaq.

§ 2-mut

Siunnersuutigineqarpoq Inatsisartut inatsisaat ulloq 1. januar 2021 atuutilissasoq.